



## CLUB DA SKIS BREIL/BRIGELS

### Protocol dalla radunonza generala dils 20 da matg 2017, allas 20.15 uras ell'aula dalla casa da scola Breil

#### Tractandas:

1. Beinvegni
2. Appel ed elecziun dumbravuschs
3. Protocol
4. Rapports annuals:
  - 4.1 President
  - 4.2 Cau JO
  - 4.3 Cautegia Alp Quader
  - 4.4 Cau material Tegia Alp Dado
5. Rendaquen ed approbaziun
6. Fixaziun dallas contribuziuns annualas
7. Mutaziuns
8. Elecziuns
9. Program da lavur 2017/2018
10. Discussiun e varia

---

#### 1. Beinvegni

Il president David Cathomen fa a tuts presents in cordial beinvegni alla 63-avla radunonza generala. In beinvegn spezial fa el a nies hosp da questa sera, signur Gaudenz Bavier, president dil BSV.

Suenter entgins plaids d'introducziun arva David ufficialmein la radunonza. El constatescha, ch'igl invit ei succedius tenor ils statuts e che la radunonza generala ei cumpetenta da prender las decisiuns necessarias.

#### 2. Appel ed elecziun dumbravuschs

Tenor la gliesta da presenza ein 28 commembers presents alla hodierna radunonza generala. Igl ei vegniu inoltrau buca meins che 44 perstgisas.

Sco dumbravusch vegn il Patric Maissen proponius ed elegius.

#### 3. Protocol

Il protocol dalla radunonza generala dils 21 da matg 2016, redegius da René Cavegn, ei vegnius publicaus sin la pagina d'internet sut [www.ski-breil-vuorz.ch](http://www.ski-breil-vuorz.ch). Da preleger il protocol vegn desistiu. Il protocol vegn approbaus unanimamein.

#### 4. Rapports annuals:

##### 4.1. President

El rapport annual lai il president trapassar cuort il curriu e passau digl onn 2016/2017. Cheu entgins cavazins ord siu rapport detagliu.

- Tura alpina sil Péz Terri sin 3'150 msm. 22 personas ein stadas dalla partida.
- Grondiusa lavur tier l'JO. Deplorablamein basegnan ils affons (e mintgaton era geniturs) in refrestg ell'educaziun. Quei stuncientescha la lavur dils menaders bravamein.
- La nova porschida pil cuors da lavinas ha deplorablamein stuiu vegnir annullada. Senza neiv, neginas lavinas.
- Il di da skis el territori da Sedrun ei vegnius annullaus muort las paucas annunzias.
- Viseta al slalom special dil campinadi mundial a S. Murezi cun 17 commembers(as).

- La cuorsa dils club ha giu liug ils 26-02-2017 a Davos Tuor. Il David engrazia alla scola da skis Breil, la quala ha mess a disposiziun las pistas ed il mesiratemps, ton per la cuorsa da skis sco era per la cuorsa liunga.
- A Rolf Menzi engrazia el pil sponsoring dil niev bucal dallas damas.
- Questa primavera havein empustau novas giaccas pils commembers. Buca meins che 67 giaccas ein vegnidas empustadas.

Il president engrazia a tut tgi ch'ei sefatgs meriteivels pil beinstar dil Club da skis Breil/Brigels. Silsuenter siara il president siu rapport.

#### **4.2. Cau tecnic**

Il cau tecnic, Reto Caduff, presenta detagliadamein siu rapport.

El presenta l'organisaziun cun sias 3 persunas al tgamun. Il Casper Elvedi ei il chef dalla gruppa da cuorsa, il Sven Lang ei il coach e Reto meina las gruppas allround e cuorsa liunga. Ils 30 menaders, da quei 9 giuvnas/damas, han prestau buca meins che 600 uras d'instrucziun. Cun grond engaschi sesprovan els da dar vinavon als affons il plascher vid il sport d'unviern. El puntuescha denton era, che la lavur dils menaders ei da muossar als affons dad ir cun skis, snowboard ni cuorsa liung e buca d'educar ils affons. Gliez ei e resta caussa dils geniturs.

Totalmein han 67 affons profitau dallas differentas purschidas. Deplorablamein ha il Sven annunziu ch'el seretila sco coach, e quei suenter la proxima sesiun. Aschia ei Reto gia ussa sin la tscherca d'in(a) successur(a). Ei fuss ideal, sche quei interessent savess schon seluvrar en ensemen cul Sven duront la proxima sesiun.

Sco davos engrazia Reto a tuttas e tuts ch'ei segidai cun l'JO sin ina u l'autra moda.

#### **4.3. Cautegia Alp Quader**

Il niev cautegia, Guido Caduff, rapporta dil curriu e passau sin l'Alp Quader. Buca meins che 10 gruppas han reservau la tegia Alp Quader. Muort munconza da neiv ein l'emprema e la tiarza gruppa buca vegnidas. La secunda gruppa ha buca schau stermentar ed ei stada presenta. Muort las grondas ferdaglias el schaner ein las lingias d'aua deplorablamein schelladas en ed ha aschia impediui als ulteriurs interessents da saver prender dimora per entgins dis sin l'Alp Quader. Quei ha giu per consequenza, che tuts han stuiu vegnir dislocai en auters loghens. Muort il grond engaschi da Surselva Tourismus ei quei era gartegiau, nua ch'igl ei stau giavischau. Entginas gruppas han sin fundament da quels fatgs desistiu da vegnir a Breil. Aschia sto Guido serar giu siu rapport cun in trumpada persunala, per la quala el sa denton nuot persuerter. La vischnaunca renunzia al tscheins annual, aschia che nus havein silmeins buca da purtar cuosts supplementars.

Al Guido in sincer engraziament per siu engaschi en favur dalla tegia d'Alp Quader.

#### **4.4. Cau material Tegia Alp Dado**

La radunonza dall'uniun tegia Alp Dado ha giu liug ils 6 da matg 2017. Presents eran David Cathomen, Reto Caduff e Guido Caduff dil CSB sco era Remo Veraguth e Casper Elvedi dil CSV. Il davos unviern ei vegniu menau atras mo 3 cuorsas (2 cuorsas entras il Club da skis Vuorz e la cuorsa finala dalla Scola da skis Breil). La fin zercladur ei vegniu fatg lavur cumina. Igl ei vegniu pinau finiastras, fatg uorden e montau ina tabla cul num dalla tegia. Pil mument muossa la cassa ora ina facultad da frs. 1'785.00. Marcus Candrian da Vuorz ha susteniu la Tegia Alp Dado cun in pagament da frs. 300.00 per la reclama. Deplorablamein ha il CSV montau quella reclama per il fevrer, aschia che Marcus Candrian ha era pagau mo frs. 300.00 enstagl dils usitai frs. 500.00.

Tut ils rapports vegnan pri encunter cun engraziament e senza damondas. Ils rapports en scret ein archivai ensemen cul protocol.

### **5. Rendaquen ed approbaziun**

La cassiera Madlaina Livers presenta il quen 2016/2017. Il quen siara cun ina sperdita da frs. 10'745.40. Il rendaquen vegn medemamein archivaus ensemen cul protocol.

Ils revisurs Margrit Eggenberger e Marcus Leu han revidiu il quen e giudicau quel sco en uorden.

Il rapport vegn prelegius da Marcus Leu. El propona d'approbar il quen sco presentau e da dar scarica alla suprastanza.

Unanimamein vegn suandau alla proposta dils revisurs ed approbau il quen 2016/2017 e dau scarica alla suprastanza. Cun in grond applaus vegn engraziu alla Madlaina per la lavur prestada.

## 6. Fixaziun dallas contribuziuns annualas

SwissSki ha alzau las contribuziuns marcantamein. Aschia propona la suprastanza d'alzar las contribuziuns dils seniors e commembers passivs e da schar las contribuziuns dils juniors sco tochen da cheu.

frs. 10.00 per juniors (14 entochen 19 onns)	- tuttina sco igl onn avon
frs. 45.00 per seniors e commembers passivs	- alzament da frs. 15.00 enviers igl onn vargau

Suenter ina cuorta discussiun vegn votau giu sur dalla proposta dalla suprastanza. Cun ina suletta abstenziun vegnan las contribuziuns annualas fixadas sco presentau.

## 7. Mutaziuns

**Sco novs commembers vegnan recepi unanimamein:**

- Flury Regula
- Arpagaus Therese
- Giger Heidi
- Muoth Fabiana
- Calörtscher Sereina
- Schmed Ramon

**Extradas ord nies club:**

Deplorablamein havein era stuiu prender encounter entginas extradas:

- Alig Lea
- Baumann Alain
- Derungs Nicole
- Camartin Marco
- Cavegn Aluis
- Mognetti Franco
- Mognetti Regula
- Seiler Robert
- Cathomen Augustin.

Cathomen Augustin ei morts suenter ina maligna malsogna ella vegliadetgna dad 81 onns. El ei staus president dil club els onns 1958-1964 e daventaus commember d'honor. Differentas gadas ha Augustin era gudignau nies bucal ambulont. En honor e regurdientscha d'Augustin supplichescha David per in cuort memento.

## 8. Elecziuns

Igl actuar, René Cavegn ha remess siu uffeci suenter 9 onns. David engrazia a René per siu grond engaschi duront tut quels onns. La Madlaina surdat a René in present ed engrazia medemamein per siu engaschi en fuorma d'in verset. René engrazia pil present denton era per quels bials ed enrihonts onns en suprastanza dil CSB.

Legreivlamein eis ei reussiu d'anflar in niev consuprastont qualificau per la suprastanza dil CSB. Il Renato Livers ei sedeclaraus promts da star a disposiziun pigl uffeci sco actuar. Deplorablamein sa Renato buca esser presents oz alla radunonza muort ina nozza.

Ulteriuras propostas vegnan buca fatgas e Renato vegn elegius unanim en siu niev uffeci. Cordiala gratulaziun.

## 9. Program da lavur 2017/2018

Pigl onn 2017/2018 vegnan las suandontas activitads proponidas ed approbadas unanimamein:

- **excursiun da stad 2017**; ils 27 d'ost 2017 ei previu ina spassegiada da famiglia. Il liug vegn aunc fixaus entras la suprastonza. L'excursiun vegn scretta ora ed il president supplichescha schon oz da far part allas occurenzas dil club.
- **instrucziun d'JO**; l'instrucziun d'JO entscheiva quest atun puspei cul fitness e naven dil december cun skis, sche las relaziuns da neiv laien tier ei.
- **di da skis**; nua, co e cum ei aunc buca definiu. Il president vegn ad informar ad uras.
- **cuorsa dil club**; il president vegn a publicar la cuorsa ad uras e selegra gia ussa sin ina gronda participaziun. Previda ei la cuorsa si el territori da skis.
- **cuorsas d' JO / BSV / FIS**; David sclarescha giu sch'il CSB savess puspei inagada menar atras ina cuorsa.
- **Viadi alla cuppa mundial ad Adelboden ni Wengen**; la suprastonza mira da saver organisar in viadi ad ina ni l'autra dallas suranumnadas cuorsas.

## 10. Discussiun e varia

### Lavur cumina vid mirs schetgs

Il CSB ei vegnius fatgs attends dil gerau Roman Benedetg Cathomas ch'ei fan lavur cumina vid ils mirs schetgs denter Dardin e Breil. Els ein promts da pagar allas uniuns ina suma da frs. 10.00 per ura e commember. Sch'il commember vegn pliras gadas alla lavur cumina, vegn l'indemnisaziun alzada suenter igl emprem di sin frs. 15.00/ura. Ulteriuras informaziuns suondan aunc.

### Cuorsa dil club

Fabio Tuor ha buca saviu esser presents alla hodierna radunonza. Perquei ha el informau il president cun in scriver sur da siu giavisch. La cuorsa dil club ei ord sia vesta vegnida disvaletada cun cuorsas da cletg e giucs sil territori Davos Tuor. El fa la proposta da puspei menar atras las cuorsas dil club el territori da skis sin la pista FIS. Quella proposta vegn sustenida da pliras persunas ord il miez (Eugen Friberg, Aluis e Berta Cathomen). Ins vul evitar, che la tradiziun e l'impurtonza dil bucal vegnan disvaletadas. Quei ei era el senn dalla suprastonza. La proxima cuorsa vegn ad haver liug el territori da skis sin la pista FIS ni la pista da cuorsa permanenta. Sco schon pli baul, ei ina evtl. collaboraziun cul CS Vuorz pusseviva, sch'ins vegn da secunvegnir sil medem datum. Quei vul dir ch'in club fa l'installaziun e l'auter club la deinstallaziun dil percuors.

### Engraziament allas pendicularas Breil/Vuorz/Andiast

David engrazia allas pendicularas per la fetg buna preparaziun da pistas. Tala lubescha ina perfetga instrucziun d'JO e fa era schiglioc grond plascher.

### Termins dallas radunonzas dallas unius tetgalas

08-06-2017	SST a Glion
07-06-2017	BSV a Buchen
24-06-2017	SwissSki a Losone

Sch'enzatgi ha interess d'accumpignar il David ad ina u l'autra radunonza, eis el supplicaus da s'annunziar tiel David.

### Salid dil BSV, signur Gaudenz Bavier

Gaudenz informescha cun in per cefras sur dil BSV, il qual sa festivar igl onn 2019 100 onns d'existenza. Il BSV ha 13'051 commembers, 6 centers da prestaziun alpin e tuttina biars pil nordic. 5 centers da prestaziun per Snowboard e Freeski e daniev 1 per la sparta biathlon.

El engrazia alla suprastonza ed al club per la buna lavur en favur dil sport d'unviern. Che quella sepaga, han ils oreiffers resultats dil BSV sil sector dils juniors mussau.

El engrazia ch'el ha astgau esser presents oz e giavischa a nies club tut bien pil futur.

### Proxima radunonza generala dil CSB

La proxima radunonza generala dil CSB vegn da raschun a haver liug ils 19-05-2018. David supplichescha gia ussa da nudar quei termin.

Il president siara la radunonza allas 21.30 uras. El engrazia aunc inagada a tuts ch'ei s'engaschai per nies club sco era per la preschientscha alla hodierna radunonza.

En num dil CSB, offerescha la suprastonza a tuts presents in sitg el Hotel Vincenz.

Breil, ils 06 da zercladur 2017

igl actuar:

il president:



René Cavegn

David Cathomen